

春在堂全書

第十二冊

春在堂稌文六編五

德清俞樾

蓉生俞君墓志銘

君諱汝榮字耀宗別字蓉生俞氏其先爲山東益都縣人後有諱珣者爲剡令遂家於剡世爲越著姓入國朝有諱巽林者始遷嘉興居梅會里傳至君父四世矣父諱球先娶於周後娶於王君則王出也於兄弟行居四生甫周歲乳媼抱聽鄰兒讀卽能效其聲五歲讀書日盡數十行羣兒鳩車竹馬之戲從未闌入其隊也九歲居父喪哀毀如成人家故豐至是稍落母王太孺人

謂之曰吾家故賈也毋徒事帖畢於是始棄儒而賈及
長精於權會候時轉物操贏制餘雖老於就時者謝弗
及又耐勞勩與童僕同苦樂人樂爲用家益以饒性好
施與至是始得行其志鄉里之間翕然稱善人當是時
禾中諸名士如馮君柳東張君叔未皆以經術文章負
東南壇坫重望咸折節與君交不以君爲貨殖傳中人
而薄視之也嘗設一米肆厯五歲而貧戶賒賃者已百
餘家辜計其錢則三百餘萬慨然曰貧不能償索亦何
益舉其簿籍而焚之雖然吾何以爲繼乎閉其肆不復
啟嗟乎君之爲賈也其諸異乎人之爲賈者矣咸豐十

年粵賊自蘇犯浙陷嘉興君佐縣丞瞿公綬章練民兵
守梅會里賊至屢擊退之里中賴以少安七月甲寅賊
大至眾潰瞿公死之君被創仆地有團丁識君者扶之
起挾以遁君叱曰吾何遁乎其人曰不然梅里陷矣君
有老母宜歸視存亡君瞿然驚趨歸其家則王太孺人
已積薪自焚一婢秋菊從之死君大慟將投於水其人
又曰不可徒死無益今宜先斂其遺骸事定爲表揚其
義烈斯人子事也君大悟乃不死同治初東南平君復
治故業益自節儉搢數年粗復其舊乃以太孺人死
難事實聞於有司以達於朝同治八年旌表如律詳

載嘉興府志及梅里志太孺人之烈始不泯矣君經亂
離家業稍替然好善樂施急人之急如故也當七十歲
生日三族之親皆謀以一觴爲壽君力止之惟購棉衣
數百襲以衣里中之寒者曰此卽吾所以爲壽矣光緒
十年十二月甲申卒於家年七十一娶曹氏生子二幼
者殤長子曰東麟居母喪以毀卒生子五殤其四存幼
子曰國光輸粟振鄭州水災以州同注選籍加級請封
父母故君得四品封某年日月國光葬君青石環橋之
南以狀乞銘銘曰

其幼也有志於詩書其壯也克奮於戎行其入也以孝

友修於家其出也以善士稱於鄉雖隱於市令聞孔彰修德俟福子孫其昌嗚呼是亦吾宗之良

資州直隸州知州高君墓志銘

嗚呼當今之世爭言自強矣然而自強之道不外孟子反本之說省刑罰薄稅歛修孝弟忠信以教其民使人皆知親其親長其長則可使制挺以撻堅甲利兵矣是故得才知之士百不如得循良之吏一乃幸得一循吏而又不使得竟其用此吾所以歎息而銘高資州也故資州牧高君諱培穀字怡樓貴州貴筑人曾祖某祖某父某君弱冠入縣學時黔以苗亂停鄉試乃一意肆

力於經世之學會其父官蜀君從之官閒爲代治官書
精審如老吏父喜曰此子可仕矣爲納貲以知縣分發
四川同治八年除梓潼令縣爲川北孔道舊設夫馬局
令署所需亦取給焉歲逾萬金君嚴汰之無何以憂去
官免喪除西充令地苦瘠民飯薯芋食穀婦女多以小
忿輕生婦族則糾數十人至壻家叫囂墮突意在一飽
而已君禁革其俗又勸課農桑振興文學邑以大治郡
守李君知其才遇有疑獄輒使鞠之君治獄無旬日淹
者李君以告黔撫丁文誠公稱循吏第一光緒三年
奏以君權知綿竹縣盜藪也有盜聚鄰縣茂什間謀以

十月朔襲綿竹君偵知其事親往捕之得孫馮二盜遂以無事又有安縣盜曰董麻二大掠於其縣境勢甚張大府命君往援至則賊僞遁君察其僞整隊伍待之於笕箕灘踰二日賊果回撲安縣大敗之安縣以全犒賞官兵民團悉出已資或曰是可支官帑不則斂之里甲君笑謝不從也董麻二跳至郫縣爲所獲檻送省城鞫之株連羅江謝茂賢縣竹葉善人等數十家省符下兩縣羅江令捕送謝茂賢等數十人以應君則曰是皆吾良民也盜口安足信邪親詣大府力白之事遂解而羅江謝茂賢等亦與俱免兩邑民皆呼青天縣竹筠饑君

初至卽倡捐積穀積萬餘石乃設三十九局計戶口散錢米全活甚眾又倡修城南石橋以便行旅故其去任也民皆走送踰竟使善畫者繪圖紀之名曰攀轅圖大府羅君在綿竹政績以卓異聞報可荊州所屬大邑縣與崇蒲接壤俗武悍雖婦孺亦佩刀有盜魁曰李金毛狗橫行於竟縣令甫下車而一夕間以盜劫報者三十餘家大府謂非君往不可乃由綿竹調大邑君行保甲法嚴連坐律境內稍戢而鄰邑盜日熾君易裝潛出廣布耳目於邛州古水碾獲金毛狗於是羣盜皆散邛大間兩年無一盜案大府敘功入告詔俟補缺後

以繁缺知府用俄又由大邑調巴縣巴縣詞訟之繁甲
於一省前令率請委員助鞫一訟或數易其員奸民蠹
吏因以爲利獄愈不治君則事無巨細必躬聽之日坐
堂皇不足則繼以燭至丙夜不息數月之後訟牒稀少
君前在綿竹大邑皆以能治盜稱至是又咸稱其能治
獄焉五年 奏補資州直隸州知州最君一生惟官資
州最久治蹟亦資州最著其風政修明流愛於人者蓋
不可勝紀今舉其大者著於篇州城舊有書院三曰珠
江曰鳳鳴曰棲雲所課皆止八股時文君設立藝風書
院以課經學旁及詞章優給膏火廣儲書籍風會大開

學徒雲集鄰近如威遠榮縣遂甯安岳遠而至於中江南部西充咸來就學藝風之名大振已而駱君成驤

廷對第一與郭君燦同入翰林兩君皆君書院所取士自入國朝蜀無狀元資州無翰林皆自此始也君又籌備棚費以恤新進寒士撥還舊有賓興費以助鄉會應試膏秣之資凡此皆君之大有造於士者也地丁正賦之外有曰津貼曰捐輸者同時並征民力大困君量其貧富定爲三等上等先納次等後之下等寬至秋後民皆稱便舊有社穀分儲四鄉日久滋弊十社九空君用前在綿竹故事履行各鄉勸民儲積得穀三萬餘石

得錢五萬餘緡歲饑不害此君之大有造於民也州有
保正又有團首保主聯保團主團練此團彼保散漫無
稽君裁團歸保以一事權三時編查冬日守望於是緩
急有備民俗喜博博局相望又嗜食鴉片煙煙館亦相
望君責成保甲嚴禁游惰苟有犯者貴游不貸又有恃
其武健橫噬一鄉非列名縉紳卽厠身庠序君訪其尤
橫者五人白大府治如律於是舊俗爲之丕變在官胥
吏遇案索費曰參費曰規禮君悉罷之凡書吏辦公應
有規費酌定如干不得逾數通飭所屬一體遵行又檢
閱舊案多以買田宅成訟官利得稅役利得票一詞旣

投累年莫結君縣爲厲禁尋常田宅公平買價不得妄
告此風遂絕凡此者皆君之以義制民也舊有溺女之
習生女貧不能舉則溺之雖有育嬰堂經費不足所育
僅三四十君爲推廣益至三百自是之後溺女者稀君
憫窮民之無以生也爲恢拓養濟院憫病者之不得醫
而嬰兒之死於痘也爲創立醫局及牛痘局憫城中火
災之多也爲購置洋水龍憫獄囚瘐死者之眾也爲之
高大其屋夏予涼漿冬予寒衣凡此者皆君之以仁養
民也百廢俱興循聲大起川東西戶知之無不曰高資
州高資州云十二年調署瀘州而資有周自誠者以巨

慙爲君所懲者也時蜀督初至周至省中入以妄語君
以例撤回聽候察治及察之皆誣也君以例回任周自
誠乃走京師夤緣御史鍾德祥撫拾在資數事糾參之
朝命鄂撫譚公往按按之亦誣也君乃得白而是歲
君又嚴治博徒蘇敬廷詞連附生李傳心李傳統二李
亦走京師與周自誠合謀於是鍾御史又疏劾君朝
又命二大臣往按按之仍誣也姑坐君以治蘇敬廷案
七月不結請下部議然蘇案實非御史原劾所有且事
始五月至七月卽提省纔三月耳竟以是奪君職嗚呼
君初宰西充卽能佐郡守治獄及宰巴縣獄亦大治今

乃以易結不結坐溺職去官邪天下事蓋有不可以理
論者矣蜀士大夫下逮兒童走卒無不同聲太息未幾
而鍾御史竟以贓敗不可謂非天也君旣罷官以弟培
蘭爲湖北應城令乃往依之光緒二十二年十一月辛
亥卒於應城年六十君在籍時曾以軍功賜花翎及
在瀘州以助順直振加三品銜遇覃恩加級請二品
封妻李氏封夫人江西臨川人有賢行先嘗刲臂療其
父病繼又刲臂療其君舅病待羣從昆弟以至娣姒和
而能敬人無間言先君二十六年卒子川壽早殤銘彤
國學生銘金光緒二十年舉人銘鑾邑增廣生皆昆弟

之子爲君後者也而銘彤亦前卒君晚年又生子曰銘
鼎側室王氏出孫昌鳳孫女三銘金等奉君與李夫人
合葬於某山之原而其弟應城君篤於天顯哀其兄之
被誣不白齎恨以終也命銘金等來乞銘銘曰
方今之世尤重循吏吏職克修宇內咸治省刑薄稅型
仁講義民之衛上身之使臂可使制梃撻彼堅利雖有
外患何隙之覬漢重循良蓋有深意銘高資州風示有
位

雲南巡撫譚公墓碑

光緒二十年十一月丙申雲南巡撫兼署雲貴總督譚

公薨於位

天子以公宣力邊疆克勤厥職

命視巡

撫例

賜卹至二十二年又以公莅滇八年勲績卓著

宣付史館以彰勞勩越四年而公第三子啟瑞自京師
寓余書請爲文以文其墓道之碑按狀公諱鈞培字賓
寅別字序初其先由廣東茂名縣遷貴州黎平又遷鎮
遠遂爲鎮遠人曾祖會文祖述康父人傑道光十二年
舉人歿祀鄉賢祠曾祖妣呂祖妣夏與李妣梁三代皆
以君貴累贈至一品君未冠入縣學咸豐九年應順天
恩科鄉試中式舉人同治元年成進士改庶吉士散
館授編修兩充順天鄉試同考官八年補江西道監察